

# Is Surat Diyà Te Menge Hibriyuhanen

## Is Mehitenged te Surat he Para te Menge Hibriyuhanen

Naawà is kezasig te menge tumutuu he mibpesuratan kayi he surat. Heini sikandan menge Hudiyu piru mid-engkezan dan en is negimeratan dan he menge tuluuwen su iyan dan midtuuwan si Jesus. Iyan, egkeregenan sikandan su edsudien sikandan te zuma zan he menge Hudiyu su iyan kun mid-iniyugan dan is tinuuwan he iyan midtukud duen is Megbevayà.

Wazà metueni ke hentei is midsurat kayi, piru egketuusan ta he Hudiyu gihapun he neketuu en ki Jesus. Mibpesuratan din sikandan su edlig-enan din is kedsarig dan ki Jesus su para kenè dan meiniyugi is kedtuu zan.

Diyà te nehuna he timpu, midsugù te Megbevayà si Moises he penguluwi zin is menge Hudiyu, ne pinaagi ki Moises imbegey te Megbevayà diyà te kandan is menge sugù din. Migkegiyan daan sikandan te Megbevayà he mebpenilbi sikandan kandin pinaagi te kebpeмуhat te menge ayam he edtutungen para te salè dan. Ne iyan heeyan ed-ul-olahan te menge Hudiyu he wazè pa mekesarig ki Jesus. Piru is tegisurat kayi, nekagi zin he is langun dutun, menge alung dà te nengeulaule en diyà te ki Jesu Kristu. Ne maan is egketintal zan pa he edlikù edsarig te kenà ebpeketavang kandan, te lavew man si Jesus te langun dutun?

Umba emun ebpesipelahan sikandan tenged te kedtuu zan, kinahanglan he kenè dan iniyugi is kedtuu zan, kekenà, iringi zan is menge kepuun dan he si Abel, si Inuk, si Noe, wey si Abraham wey te zuma pa he nengekilala tenged te kedsarig dan te Megbevayà minsan pa te nekesagad sikandan te menge kemeregenan.

---

## Is Anak te Megbevayà Lavew te Velinsuguen Din

**1** <sup>1</sup> Dengan duen impesavut te Megbevayà diyà te menge gin-epuan tew pinaagi te menge etew he ebpeneuven din. Mezakel is menge paagi te kebpeneuva kandan ne mezakel zaan is impesavut din pinaagi kandan. <sup>2</sup> Iyan, guntaan, duen impesavut te Megbevayà kenitew pinaagi

te Anak din. Ne heini is Anak din, pinaagi kandin ne nelimbag te Megbevayà is minsan hengkey; ne midhimu sikandin te Megbevayà he Nengazen te minsan hengkey. <sup>3</sup>Pinaagi kayi te Anak din ibpezayag is mekegegehem he anlag te Megbevayà su noked-iring dan. Ke hengkey is Megbevayà ne iyan ded daan sikan is Anak din. Ne pinaagi te gehem te kegkagi kayi te Anak ebeyveyaan din is minsan hengkey he linimbag. Ne hein nepasad din en is ked-ewaa zin te menge salè tew, mid-uli diyà te langit ne mibpinuu ziyà te egkekewanan te Megbevayà su edhadì.

<sup>4</sup>Impaahà kenita te Megbevayà he utew lavew is Anak din, kenà is menge velinsuguen din diyà te langit, ne iring din ded daan, lavew is inggerar zin te Anak din, kenà is inggerar zin kandan. <sup>5</sup>Su zuen insurat he Lalag te Megbevayà diyà te Anak din he edhenduen te,

“Iyan ka Anak ku ne egkegiyen ku kenikew  
he guntaan ibpeehè ku  
he Amey a kenikew.”

Iyan, wazà belinsuguen din he migkegiyan din te iring dutun te minsan keenu he timpu. Ne zuen pa insurat he Lalag te Megbevayà he edhenduen te,

“Egkehimu he iyan a Amey zin  
ne iyan sikandin Anak ku.”

Ne kenà iyan is belinsuguen egkegiyen din dutun. <sup>6</sup>Ne migkagi zaan is Megbevayà mehitenged te kakey he Anak din dutun te timpu te kedsugua zin kandin dini te kelibutan, ke sikandin te,

“Kinahanglan he ed-ezapen sikandin te langun he menge  
velinsuguen te Megbevayà.”

<sup>7</sup>Ne iyan mulà migkagi te Megbevayà mehitenged te menge velinsuguen din is:

“Menge sugù ku zà sikandan,  
ne egkehimu ke edhimuwen ku  
sikandan he iring te keramag,  
ne emun kenà, ne iring te hapuy  
ke iyan egkesuatan ku.”

<sup>8</sup>Ne iyan lalag din diyà te Anak din is:

“Iyan ka Megbevayà ne wazà pidtemanan te kedhadì nu.  
Metazeng is kedumala nu te ginhedian nu.

<sup>9</sup>Iyan egkesuatan nu  
is metazeng he ulaula ne igkeepes nu is mezaat he ulaula.  
Tenged kayi, siak is Megbevayà nu,  
midhimu ku sikew he lavew te menge zuma nu ne imbegey ku kenikew  
is utew zekelà he kelipey.”

<sup>10</sup>Ne zuen pa insurat he Lalag te Megbevayà he edlelagan din is Anak din he edhenduen te,

- “Sikew is Nengazen,  
 iyan ka nenlimbag te tanà,  
 ne kenikew he velad is mibaal te langit.
- <sup>11</sup> Ne minsan pa te egkehanew keuzemà is langit wey tanà,  
 kenè ka mulà egkehanew.  
 Iring dan te manggad he egkezeetan.
- <sup>12</sup> Iring te kedlumpia te kumbalà,  
 edlumpien nu is langit wey tanà ne ed-ilisan nu.  
 Iyan, sikew,  
 kenè ka mulà egkehalin;  
 is untung nu ne wazè din pidtemanan.”
- <sup>13</sup> Wazà belinsuguen te Megbevayà he migkegiyan din te,  
 “Dini ke zè pa pinuu te egkekewanan ku  
 taman te kenè ku pa ibpeluhud  
 diyà te kenikew is menge kuntada nu.”
- <sup>14</sup> Iyan, is menge velinsuguen te Megbevayà, menge suluguen dà sikandan  
 te Megbevayà. Kenè tew egkeahà, iyan, edsuguen din sikandan wey kiw  
 zan metevangi is menge etew he edtulusen keuzemà.

### Is Kelibriyanan

**2** <sup>1</sup>Ne tenged kayi, kinahanglan he edhemenan tew ebpurungi is tutuu  
 he tulluwwen he impenurù kenitew wey tew kenà melekai su kela ke  
 mekesuwey kiw te tutuu he ibayà. <sup>2</sup>Su is kesuguan he imbegey zengan te  
 Megbevayà pinaagi te menge velinsuguen din, netuenan tew he is minsan  
 hentei he nekesupak kayi, midsilutan te Megbevayà sumalà is supak din.  
<sup>3</sup>Ne iring din ded daan, sikitew is menusiya, kenè kiw zaan ebpekelikey  
 te silut te Megbevayà emun ebey-anan tew, ne kenè tew edtumanen is  
 impenurù kenitew mehitenged te mekegegehem he kedlibriya zin kenitew  
 te silut. Is nehuna he nekepenudtul kayi, ne iyan en is Nengazen tew he si  
 Jesus. Ne is menge etew he nemekezineg kandin, edtistigusan dan dini te  
 kenitew he tutuu heini. <sup>4</sup>Ne is Megbevayà, midtistigusan din daan haazà is  
 impenurù dan su mibegayan din sikandan te gehem wey zan ikepaahà is  
 menge singyal, wey menge egkein-inuwan he kenà ed-iring-iring. Ne zuen  
 daan menge ketau he imbegey zin diyà te menge tumutuu pinaagi te ked-  
 ulini kandan te Wagas he Mulin-ulin sumalà is egkesuatan din he ebegayan.

### Si Jesus Nehimu he Iring te Menge Suled Din

<sup>5</sup>Ne ibpesavut ku keniyu is kelibutan keuzemà he id-ilis te Megbevayà  
 kayi te kelibutan tew guntaan. Ne wazà pilia te Megbevayà is menge  
 velinsuguen din he ebayàbayà dutun keuzemà he kelibutan, <sup>6</sup>kenenà,  
 iyan mibpili din is menge etew. Su zuen insurat he lalag he egkeehè ta  
 kayi te menge surat dengan he edhenduen te,

“Sikew, Megbevayà,  
 maan is kenè nu egkelipatan is menuisiyà?  
 Etew zà duen, ne maan is ebpurungan nu?”

<sup>7</sup> Midhimu nu he lavew kandin is menge velinsuguen nu,  
 iyan, taman te mevavè dà he timpu  
 su migkagi nu he zuen timpu keuzemà he kinahanglan  
 he edtulusen wey edtehuzen is menuisiyà.

<sup>8</sup> Ne migkagi nu zaan he kinahanglan  
 he keuzemà edhimuwen nu he mekevayàbayà sikandin te minsan  
 hengkey.”

Iyan haazà insurat dengan. Ne geina te migkagi zutun he edhimuwen  
 te Megbevayà is menuisiyà he ebayàbayà te minsan hengkey, egkesavut  
 ta zutun he zuen timpu keuzemà he wazà minsan hengkey he linimbag  
 he kenà egkeveyveyaan te menuisiyà. Ne guntaan netuenan ta he kenè  
 pa ebpekevayàbayà is menuisiyà te iring dutun. <sup>9</sup> Ne minsan pa zutun,  
 mibpeetew si Jesus ne pinaagi kayi midhimu he lavew kandin is menge  
 velinsuguen taman te mevavè dà he timpu su wey tenged te zekelà he gagew  
 te Megbevayà, mebbehimatey sikandin he elili te tivuuk he menuisiyà.  
 Ne tenged kayi te kebbehimatey zin, ne nehimu en sikandin guntaan he  
 utew telehuzen wey utew belentugen ne imbegey kandin te Megbevayà is  
 kebayaàbayà te minsan hengkey. <sup>10</sup> Is Megbevayà he nenlimbag te langun  
 su wey mehimu is langun he igkezeligi kandin, ne utew hustu is kedtuguta  
 zin he mekeantus si Jesus te merasey su pinaagi kayi impeehè din he wazà  
 igkesawey ziyà te ki Jesus, ne egkehimu he mezakel kiw is edhimuwen din  
 he menge anak te Megbevayà su wey kiw metulus iring te kedtulusa kandin.  
 Nehimu si Jesus he ibayà wey kiw melibri te silut.

<sup>11</sup> Si Jesus, mibpalis din en is menge salè tew. Ne guntaan sikitew is  
 nepelisan te salà wey sikandin is mibpalis te salà, sebsevaha zà is Amey  
 tew he iyan is Megbevayà. Ne tenged kayi kenè kiw igkeeled ni Jesus,  
 kekenà, egngezanan kiw zin te menge hazi zin. <sup>12</sup> Su zuen insurat he lalag  
 din he edhenduen te,

“Sikew is Megbevayà, edtudtulan ku is menge hazi ku mehitenged  
 kenikew.

Egkentahan ku is kedalig ku kenikew ziyà te etuvangan te langun he  
 ed-azap kenikew.”

<sup>13</sup> Ne geina te menuisiyà daan sikandin migkagi sikandin te,  
 “Edserigan ku is Megbevayà.”

Ne ke sikandin daan te,

“Heini e zed he edumahan te menge zuma ku he menge anak te  
 Megbevayà he insarig din kedi.”

<sup>14</sup> Ne sikitew is menge anak te Megbevayà, menge etew kiw zà duen  
 he zuen din kemetayen. Ne tenged kayi mibpeetew zaan si Jesus wey

mehimu sikandin he iring tew. Umba mid-ulaula zin heini su wey mehimu he ebpehimatey sikandin ne wey pinaagi te kebpatay zin mezaag din si Setanas he iyan mibayàbayà te kemetayen, <sup>15</sup>ne wey pinaagi kayi metevangi kiw zin ne libriya kiw zin te kemetayen. Su zengan te wazè kiw pa libriya, kenà egkeawà dini te kenitew is kegkehandek te kemetayen ne iring te menge uripen kiw zutun te kegkehandek. <sup>16</sup>Ne kenà iyan is menge velinsuguen din midtevangan din, kekenà, iyan kiw zin midtevangan is menge kevuwazan ni Abraham. <sup>17</sup>Umba kinahanglan he ebpeetew sikandin su wey mehimu sikandin he iring kenitew te menge suled din te minsan hengkey he paagi. Ne mid-ulaula zin heini su wey mehimu sikandin diyà te etuvangan te Megbevayà he iring te lavew he memumuhat tew he utew hihizuwen wey metinumanen su wey zin mepalis is menge salè tew. <sup>18</sup>Ne egkehimu en he egketevangan din is ebpenulayen ni Setanas su nesegazan din en is kemeregenan tenged te kebpenulaya kandin.

### Si Jesus Lavew ki Moises

**3** <sup>1</sup>Ne tenged kayi, menge suled ku te kedtuu, mid-umbita kew zaan te Megbevayà wey kew mekeubpà keuzemà diyà te langit. Purungi niw isipa si Jesus. Iyan sikandin kes midsugù te Megbevayà dini te kelibutan wey sikandin mehimu he lavew he memumuhat he edtavang kenitew kayi te kebpesakup tew te Megbevayà.

<sup>2</sup>Su si Jesus, ne mibpurung medtuman te langun he ebpeveelan kandin te Megbevayà, iring te si Moises, nepurungan din daan te edtuman is langun he mibpeveelan kandin dutun te kebeyveyai zin te valey te Megbevayà, *he ke và dà egkegiya, menge etew he sakup te Megbevayà.*

<sup>3</sup>Iyan, si Jesus, ed-isipen sikandin te Megbevayà he utew pa lavew kenà si Moises, iring te lavew is ebvaley kenà te valey. <sup>4</sup>Netuenan ta he ke zuen baley ne zuen daan mibaal zutun te valey, ne is mibaal te minsan hengkey ne iyan is Megbevayà. <sup>5</sup>Ne si Moises, suluguen sikandin he metinumanen is kebayàbayè din te valey te Megbevayà ne nehimu is menge vaal zin he alung te ibpaahà te Megbevayà te egkeuget pa zutun he timpu egketuman. <sup>6</sup>Ne si Jesus mulà, Anak sikandin te Megbevayà he metinumanen is kebayàbayè din te valey. Ne iyan kiw valey zin emun edhemenan tew is kedsundan tew kandin wey is melipayen he kedtegazi tew te langun he impenaad kenitew ni Kristu.

### Is Kedhimeley he Integana te Megbevayà

<sup>7</sup>Su zuen insurat he lalag te Wagas he Mulin-ulin he edhenduen te, “Guntaan emun egkezineg niw is lalag keniyu te Megbevayà, <sup>8</sup>kinahanglan he kenà mezesen is gehinawa niw iring te gehinawa niw zengan

hein midsukulan niw is Megbevayà dutun te timpu he migezaman  
niw is ked-antus din keniyu  
zutun te tanà he wazà meubpai te etew.”

<sup>9</sup> Su migkagi is Megbevayà te,

“Minsan pa te seled te kepatan he tuig nengeehè dan is menge  
egkein-inuwan he mibeelan ku,  
ne migezaman dan pa ke hendei taman is kebpelevaya ku te menge  
mezaat he ulaula zan.

<sup>10</sup> Umba, utew a zutun

nepauk kandan, ne ke siak te,

‘Layun egkesayep is ed-isipen dan ne kenè dan egkesuat he edtuman  
te menge sugù ku.’

<sup>11</sup> Ne utew a nepauk ne migkagi ku he utew tutuu he kenè dan en  
ebpekeseled

dutun te integana ku he inged wey zan mekehimeley zuma kediey.”

<sup>12</sup> Umba, menge suled, susiya niw is gehinawa niw. Kinahanglan  
he wazà minsan sevaha keniyu he mezaat is ed-isipen din nè wazè  
din kedtuu, su pinaagi kayi egkeengkezan din is wazè din kemetayen  
he Megbevayà. <sup>13</sup> Ne guntaan te kemulu pa egkehimu he egkekuwa  
is keluwasan he imbegey kenitew te Megbevayà, kinahanglan he  
ebpesemsembagè kiw su wey kiw kenà melimbungi pinaagi te salà he  
iyan is kenà kedtuu ne wey kenà mebmesezen is gehinawa tew. <sup>14</sup> Su  
sikitew, emun edhemenan tew is daan he kedsarig tew ki Kristu, duen  
tew pudu upakat kandin.

<sup>15</sup> Su iring te Lalag te Megbevayà he insurat ku en he edhenduen te,  
“Guntaan, emun egkezineg niw is lalag keniyu te Megbevayà,  
kinahanglan he kenà mezesen is gehinawa niw iring te gehinawa  
niw zengan hein midsukulan niw is Megbevayà.”

<sup>16</sup> Ne hentei heini is menge etew he minsan nezineg dan is Lalag te  
Megbevayà midsukulan dan gihapun sikandin? Iyan sikandan sikan is  
menge etew he kevuwazan ni Israyil he mid-uwit ni Moises puun diyà  
te tanà he Ihiptu. <sup>17</sup> Ne hentei is menge etew he nepeukan dengan te  
Megbevayà seled te kepatan he tuig? Iyan ded heini is menge zuma te  
kevuwazan ni Israyil he mibaal te salà diyà te Megbevayà ne tenged kayi  
midsilutan din sikandan ne minatey sikandan dutun te tanà he wazà  
meubpai te etew. <sup>18</sup> Iyan ded sikandan kes menge etew he mehitenged  
kandan migkagi is Megbevayà te, “Kenè dan ebpekeseled dutun te  
midtegana ku he inged wey zan mekehimeley zuma kediey.” Umba migkagi  
zin heini su wazè dan mebpemineg te lalag din. <sup>19</sup> Ne netuenan tew he  
wazè dan mekeseled dutun su wazè dan tuuwi is Lalag te Megbevayà.

**4** <sup>1</sup> Ne minsan pa zutun, wazà iawà te Megbevayà is daan he penaad  
din he zuen menge etew he ebpekeseled dutun te inged din wey zan

mekehimeley zuma kandin. Ne tenged kayi kinahanglan he ebpekeandam kiw su wey wazà minsan sevaha kenitew he kenà edtugutan te Megbevayà he mekeseled dutun. <sup>2</sup> Su sikitew, nezineg tew zaan is kebpenudtula te Meupiya he Tudtulanen iring te menge gin-epuan tew zengan. Iyan, minsan te nezineg dan is impesavut kandan te Megbevayà, wazà pulus kayi ziyà te kandan su zutun te kegkeziniga zan kayi, wazè dan tuuwi. <sup>3</sup> Ne sikitew mulà is nemeketuu, idtugut kenitew is kedseled dutun wey kiw mekehimeley zuma te Megbevayà. Iyan, wazà itugut te kenà edtuu su zuen insurat he Lalag te Megbevayà he edhenduen te, “Ne utew a nepauk ne migkagi ku he utew tutuu he kenè dan en ebpekealed dutun te integana ku he inged wey zan mekehimeley zuma kediey!”

Wazà iyan ikegiya zin kayi is wazè pa metegana haazà is kedhimeley su zaan en he nepasad din en heini puun pa te kedlimbaga zin te minsan hengkey. <sup>4</sup> Su zuen insurat he lalag mehitenged te ikepitu he andew he edhenduen te, “Midhimeley is Megbevayà dutun te ikepitu he andew su netapus din en is langun he ebeelan din.” <sup>5</sup> Ne migkagi en maan is Megbevayà mehitenged kayi te kedhimeley te, “Kenè dan en ebpekealed wey zan mekehimeley zuma kediey.” <sup>6</sup> Tenged kayi, netuenan ta he haazà is menge etew zengan he nehuna he nemekezineg te Meupiya he Tudtulanen mehitenged kayi te kedhimeley, wazà sikandan mehimuwa te Megbevayà he mekeseled dan wey zan mekehimeley tenged te wazè dan kebpevineg. Iyan, netuenan tew zaan he zuen menge zuma pa he ebmehimuwen mulà te Megbevayà he mekeseled sikandan wey zan mekehimeley zuma kandin. <sup>7</sup> Umba egketuenan ta heini su zuen pa andew he midtelaan te Megbevayà he zutun ebpekealed is menge etew zutun te kedhimeley he midtegana zin. Su neuget pa zutun te timpu te menge tipehuna he etew he wazà medtuu, impinted te Megbevayà is lalag din diyà te ki Hadì David. Ne ke si David te,

“Guntaan, emun egkezineg niw is lalag keniyu te Megbevayà, kinahanglan he kenà mezesen is gehinawa niw.”

<sup>8</sup> Haazà is menge tipehuna he etew, angin ke mid-uwit sikandan ni Josue ne impeseled din sikandan dengan dutun te hustu en he kedhimeley he midtegana te Megbevayà su kenè en kinahanglan he ibpesavut pa maan te Megbevayà is duma pa he andew he zutun ibpeseled pa maan is menge etew. <sup>9</sup> Ne tenged kayi, sikitew is menge sakup te Megbevayà guntaan, nesavut tew en he egkehimu kiw he ebpekealed wey kiw mekehimeley zuma te Megbevayà iring te midhimeley is Megbevayà dutun te ikepitu he andew. <sup>10</sup> Ne is minsan hentei he ibpehimeley te Megbevayà, ed-engkezan din en is kandin he vaal iring te midhimeley is Megbevayà dutun te kegkepesaza zin te vaal zin te kedlimbag. <sup>11</sup> Umba, sikitew zaan, ebeelan tew is taman

te egkehimu tew wey kiw zaan mekeseled dutun te edhimelayan he midtegana te Megbevayà. Kenè tew ed-iringan haazà is menge etew zengan he wazà mebpemineg te Lalag te Megbevayà su wey wazà minsan sevaha kenitew he kenà ebmehimuwen he mekeseled dutun te edhimelayan.

<sup>12</sup> Uuyag is Lalag te Megbevayà ne zekelà is gehem din. Iring te sundang he zezuwa is gerangan din he utew megarang, iyan, megarang pa is Lalag te Megbevayà kenà haazà is sundang su edlembasan din minsan is isip ta, gehinawa ta, wey tuyù ta ne igkepetuenan din kenita ke hengkey is ked-isipa kenita te Megbevayà. <sup>13</sup> Is Megbevayà, kenà sikandin egkeelasan te minsan hengkey. Egkeehè din layun is minsan hengkey he ed-ul-olahan ta. Ne ke minsan hengkey is ed-ul-olahan ta, iyan sikandin edsusi.

### Si Jesus is Utew Lavew he Memumuhat

<sup>14</sup> Ne tenged kayi, menge suled, edhemenan tew is kedtuu he impenurù kenitew. Su zuen utew lavew he memumuhat he iyan datù tew he nekid-etuvang en te Megbevayà. Iyan heini si Jesus he Anak te Megbevayà. <sup>15</sup> Ne heini si Jesus is lavew he memumuhat tew, nesavut din is keguyè tew tenged te kememenusiyai tew su nesegazan din he mibpenulayan sikandin dengan ni Setanas te minsan hengkey he paagi iring te ebpenulayan kiw zaan, iyan, wazà mulà sikandin mepenulayi. <sup>16</sup> Ne tenged kandin, wazà igkelenew te isip tew te ked-uvey zutun te etuvangan te mekegegehem he Megbevayà pinaagi te ked-ampù su utew veligegawen is Megbevayà. Ingkehizu kiw zin ne edtevangan kiw zin dutun te timpu te menge kemeregenan.

**5** <sup>1</sup> Su ke zuen etew he ebpilien he lavew he memumuhat, idsarig kandin is ked-etuvang te Megbevayà ne iyan sikandin datù te menge etew. Ne idsarig daan kandin is menge ibegey ziyà te Megbevayà wey is kebpemuhat wey mepelisi is menge etew te menge mezaat he ulaula. <sup>2</sup> Ne tenged te etew zà duen sikandin he layun egkesayep, egkehimu he mepelevayen sikandin te menge zuma zin he etew he egkengesayep daan tenged te kenè dan ebpekesavut. <sup>3</sup> Ne tenged te zuen daan kandin he menge sayep, kinahanglan he zuen ibpemuhat din tenged te kandin he menge mezaat he ulaula iring te zuen daan ibpemuhat din tenged te menge mezaat he ulaula te menge zuma zin he etew. <sup>4</sup> Utew telehuzen is lavew he memumuhat, iyan, wazà minsan hentei he ebpekehimu he ebpili te keugelingen din wey mehimu sikandin he lavew he memumuhat su iyan ebpili kandin is Megbevayà iring te mibpili din dengan si Arun.

<sup>5</sup> Ne iring din ded daan wazà iyan si Kristu mebpili te keugelingen din wey mehimu sikandin he mekegegehem he lavew he memumuhat tew, kekenà, iyan is Megbevayà su migkagi kandin is Megbevayà te,



“Iyan ka Anak ku.

Ne egkegiyen ku he guntaan ibpeehè ku  
he Amey a kenikew.”

<sup>6</sup>Ne zuen pa insurat he lalag din he edhenduen te,  
“Iring ka ki Milkisidik he memumuhat dengan,  
su wazà pidtemanan te kegkememumuhat nu.”

<sup>7</sup>Ne hein kemulu pa si Jesus dini te kelibutan, ne mibpenigis is luhè  
din ne nekelelendag sikandin tenged te utew meheget is kebuyà din  
wey ked-ampù din diyà te Megbevayà he iyan ebpekelibri kandin te  
kemetayen. Ne tenged te zekelà is kedtahud din wey kedtumana zin te  
menge sugù te Megbevayà, midineg is ked-ampù din te Megbevayà. <sup>8</sup>Su  
minsan pa te Anak sikandin te Megbevayà, ingkepenurù gihapun kandin  
is kebpeketuman te sugù te Megbevayà pinaagi te menge kemeregenan  
he nengeegiyan din. <sup>9</sup>Ne hein nepasad din en is langun he impetuman  
kandin te Megbevayà, nehimu sikandin he Menluluwas te langun he  
ebpeming kandin su wey mevegayi sikandan te untung he wazè din  
pidtemanan. <sup>10</sup>Ne zutun, is Megbevayà, midlilaan din sikandin he lavew  
he memumuhat iring te memumuhat dengan he si Milkisidik.

### Is Ked-engked te Keduu

<sup>11</sup>Dekelè pa is ibpesavut ku pezem keniyu mehitenged te  
kegkememumuhat ni Milkisidik wey ni Jesus, iyan, meregen he  
edseysayen su kenè niw en egkesavut. Henduen be te kenè en ed-uteng  
diyà te isip niw. <sup>12</sup>Neuget en is kebpeketuu niw ki Jesus, ne engayan kew  
en pezem he menge menunudlù, iyan, kenà egkehimu su kinahanglan  
he ebpekepepenurù kew pa ebpekepeuman wey niw mesavut is menge  
melemu zà he tuluuwen he ebpuun te Lalag te Megbevayà. Henduen te  
kemulu kew pa edsusu su kenè niw pa egkelutang te egkaan is mezesen  
he egkeenen, *he ke vâ dà egkegiya, is menge mezalem he ebpuun te  
insurat he Lalag te Megbevayà.* <sup>13</sup>Emun deisek ki pa he vatà ne iyan dà  
egkezawat ta is gatas, he ke vâ dà egkegiya, kenè te pa egketuenan is  
penurù mehitenged te metazeng he ulaula. <sup>14</sup>Ne emun megurang ki en  
ne egkesepè te en is mehunit he egkeenen, *he ke vâ dà egkegiya, mezalem  
en is igkepenurù kenita ne metau ki en he ed-isip-isip, ne egketuusan te en ke  
hengkey is meupiya wey ke hengkey is mezaat he ibayà.*

**6** <sup>1</sup>Ne tenged dutun, menge suled, netengkaan en is ked-istudyuwi  
tew zuen te menge nehuna he melemu he tuluuwen he impenurù  
kenitew mehitenged ki Kristu. Kinahanglan he edlaus kiw en dutun te  
ked-istudyu te menge penurù he zait te menge etew he mezesen en is  
kedtuu zan. Kenè tew ed-ul-ulitan te ed-istudyu is menge nehuna he  
impenurù kenitew iring te ked-engkezi te kedsarig te menge ulaula he  
wazà pulus, wey is kedtuu te Megbevayà. <sup>2</sup>Kenè tew ed-ul-ulitan is ked-

istudyu te kebpemewtismu, wey is kedewata te Wagas he Mulin-ulin, is kegevenhawa kenita keuzemà, wey is kedsusiya te Megbevayà keuzemà te tivuuk he menusiya, <sup>3</sup>kekenà, emun idtugut te Megbevayà, edlaus kiw en te ked-istudyu te minge penurù he zait te minge etew he mezesen en is kedtuu zan.

<sup>4-6</sup>Su penenglitan duen minge etew he neteyawan te Megbevayà is isip dan. Nesavut dan en ke hengkey is ibegey kenitew ziyà te langit, ne nekeambit dan en te gehem te Wagas he Mulin-ulin, ne netuenan dan en is meupiya he impesavut te Megbevayà, ne neehè dan daan is egkehimu te gehem he ibpaahà te Megbevayà keuzemà te ketepusan he timpu. Ne emun ed-iniyugan dan heini kenè en egkehimu he ibpelikù dan ibpeuman wey zan meiniyugi is mezaat he minge ulaula zan. Henduen be te in-uman dan iransang diyà te krus is Anak te Megbevayà ne edhimuwen dan he sumpelita sikandin te minge etew.

<sup>7</sup>Su sikitew is menusiya, ne iring kiw te tanà. Ne is tanà he layun ed-uzani ne memelambeg is minge pinemula zuen, ne zekelà is pulus kayi ziyà te tegitanà. Ne is etew he iring dutun te tanà, edtuvazan sikandin te Megbevayà. <sup>8</sup>Iyan, ke zuen tanà he iyan dà ebpeketuvù duen is minge zugiyen he sagbet wey minge hilemunen, ne wazè din pulus, ne ed-engkezan, ne ebinsulan te tegitanà. Ne iring din ded daan is etew he iring kayi te tanà su edsilutan te Megbevayà.

<sup>9</sup>Na, minge minahal ku he minge suled, minsan pa te iring kayi is minge lalag ku keniya, netuenan ku he meupiya pa mulà is egkezungguan niw su netuenan ku he zekelà is pulus te kedlibriya keniya te Megbevayà. <sup>10</sup>Su kenà egkehimu he kenà metazeng is kedsusiya keniya te Megbevayà; su kenà egkehimu he egkelipatan din is langun he meupiya he mid-ulaula niw tenged te mahal sikandin diyà te gehinawa niw su midtevangan niw is minge zuma tew he tumutuu ne minsan guntaan wazè niw engkezi is kedtevangi niw kandan. <sup>11</sup>Ne is kada sevaha keniya, egkesuatan dey he kenè niw zaan engkezi is kedhagù niw taman te kedlikù ni Jesus dutun te ketepusan he timpu keuzemà su wey zutun metuman diyan te keniya is langun he meupiya he ebpeebuten tew. <sup>12</sup>Kinahanglan he kenè kew mebpetetapul, kekenà, iringi niw is minge etew he meinentusen he edtuu te Megbevayà su tenged kayi egkezawat dan is impenaad te Megbevayà.

### **Is Penaad te Megbevayà wey is Kedlig-eni Zin te Penaad Din**

<sup>13</sup>Isipa niw si Abraham. Dutun te kebpenaazi kandin te Megbevayà, is Megbevayà, ne wazà duma he ngazan he negamit din te kedlig-eni zin te penaad din, kekenà, migamit din is kandin he keugelingen he ngazan su wazà lavew kandin. <sup>14</sup>Ne pinaagi te kandin he ngazan migkagi sikandin diyà te ki Abraham te, “Kenè en ebperis he edtuvazan ku sikew te

meupiya ne ebmezakel utew is minge kevuwazan nu.” <sup>15</sup>Ne si Abraham, utew sikandin meinentusen he edsarig te Megbevayà taman te netuman te Megbevayà is penaad din kandin. <sup>16</sup>Ne emun duen penaad te etew zà duen, iyan idlig-en din te penaad din is: duen lavew kandin he ibpepirma zin zutun te penaad din. Ne emun iyan heini ed-ul-ulahan din dutun te husayen, ebpeketuu te lalag din is ebpepeming dutun te penaad din. <sup>17</sup>Ne egkesuatan dengan te Megbevayà he mesavut te minge etew he mibpenaazan din he kenà duwazuwa he edtumanen din is penaad din kandan, ne tenged kayi midlig-enan din is penaad din. <sup>18</sup>Ne zuen dezuwa he ulaula te Megbevayà he kenà egkehalin te minsan hentei. Is sevaha, ne iyan is penaad din, ne is sevaha, ne iyan is kedlig-eni zin te penaad din. Ne pinaagi kayi te zezuwa egkesavut ta he kenà egkehimu he kenè din edtumanen is penaad din. Ne tenged kayi, sikitew is nemekeaput diyà te kandin, utew meheget is kedsarig tew kandin ne tenged kayi edhemenan tew is kebpeebuta tew te langun he meupiya he impenaad din kenitew. <sup>19,20</sup>Ne utew mezesen wey nelig-enan heini is kebpeebuta tew he edtumanen te Megbevayà is penaad din su iyan edserigan tew is Megbevayà. Ne si Jesus, ne nehimu en sikandin he zatù tew ne ziyè en sikandin te etuvangan te Megbevayà. Ne nehimu en si Jesus he lavew he memumuhat tew he wazè din pidtemanan he iring te memumuhat dengan he si Milkisidik.

### Si Milkisidik

**7** <sup>1</sup>Su heini si Milkisidik, ne hadi sikandin dengan te inged he Selim, wey memumuhat sikandin he ed-azap te lavew he Megbevayà. Ne zuen timpu zutun he si Abraham, mibpekidtebek te minge hadi he kuntada zin ne mibpenhimetayan din. Ne zutun te ked-ulì ni Abraham, midsinugung sikandin ni Milkisidik, ne migkagi ni Milkisidik pinaagi te kebpenuvadtuvad he edtuvazan si Abraham te Megbevayà te meupiya he tuvad. <sup>2</sup>Ne si Abraham, imbegey zin diyà te ki Milkisidik is ikeseputu he vahin te langun he nengetavan din. Ne heini is ngazan he Milkisidik, dezuwa is kehulugan din. Is egkehuna ne “hadi he ebpekevegey te ketazeng.” Ne tenged te hadi sikandin te inged he Selim, he ke vā dā egkegiya, kelinew, elin daan kehulugan din is “hadi he ebpekevegey te kelinew.” <sup>3</sup>Ne kenà duen dā taman su wazà gugud ke hentei is amey zin wey iney zin wey minge kepuun din, ne wazà daan guguz is kegkeetew zin wey is keagi te kemetayan din. Umba heini si Milkisidik, ebpekeiring sikandin te Anak te Megbevayà su iring te wazè din puunà, ne wazè din ketepusan, ne wazà pidtemanan te kegkememumuhat din.

<sup>4</sup>Isipa niw he utew lavew si Milkisidik su is kepuun tew he si Abraham, imbegey zin kandin is ikeseputu he vahin te netavan din dutun te kebpekezaag din te minge hadi. <sup>5</sup>Ne is minge memumuhat te minge

Hudiyu he minge kevuwazan ni Levi, ne minge kevuwazan daan sikandan ni Abraham. Ne insugù kandan te kesuguan he imbilinbilin ni Moises he kuwaa zan is ikeseputù he vahin te langun he ketigeyunan te minge zuma zan he Hudiyu minsan pa te minge kevuwazan daan heini ni Abraham. <sup>6</sup>Iyan, si Milkisidik, kenà mulà sikandin kevuwazan ni Levi ne minsan pa zutun midawat din is ikeseputù he imbegey kandin ni Abraham ne zutun, si Abraham, is mibpenaazan te Megbevayà, mibpenubtuvazan ni Milkisidik. <sup>7</sup>Ne netuenan te minsan hentei he is etew he ebpenubtuvazan din is sengeetew en, ne lavew sikandin kenà haazà is etew he ebpenubtuvazan din. <sup>8</sup>Ne is minge memumuhat he kevuwazan ni Levi, ne edewaten dan is ikeseputù ne ebpatay zan gihapun, iyan, si Milkisidik he mibegayan dengan ni Abraham te ikeseputù, sumalà is kedsevuta ta zutun te Lalag te Megbevayà, iring te kemulu pa sikandin uuyag. <sup>9</sup>Ne si Levi, iyan kepuun te langun he minge memumuhat te minge Hudiyu, ne egkesavut ta zaan he zutun te kebegaya ni Abraham te ikeseputù diyà te ki Milkisidik, nekevegey zaan si Levi ziyà te ki Milkisidik. <sup>10</sup>Su zutun te kebpeked-uma ni Abraham wey si Milkisidik wazè pa zutun ianak si Levi, kekenà, diyè pa sikandin te lawa ni Abraham he apù din.

### Si Jesus is Iring ki Milkisidik

<sup>11</sup>Ne netuenan ta he zutun te kebegaya te Megbevayà te kesuguan diyà te minge Hudiyu, midtendek din is minge memumuhat he iyan is minge kevuwazan ni Levi he iyan ed-uwit te kesuguan. Ne emun egkehimu he ebmetazeng is menusiya pinaagi te kandan he minge vaal, wazè en kinahanglan he zuen pa maan memumuhat he iring ki Milkisidik. Iyan, duen en mibpilì te Megbevayà he selakew en he memumuhat. Ne heini, ne kenà iring ki Arun he kevuwazan ni Levi, kekenà, iring sikandin ki Milkisidik. <sup>12</sup>Ne emun ed-ilisan is minge memumuhat, kinahanglan he ed-ilisan daan is kesuguan he mibenteyanan dan. <sup>13,14</sup>Ne is Nengazen tew he si Jesus he iyan memumuhat he nekeilis te zaan he minge memumuhat, kenà sikandin kevuwazan ni Levi su kevuwazan ni Huda. Ne te langun he minge kevuwazan ni Huda, iyan dà sikandin nehimu he memumuhat. Ne wazà ipesavut ni Moises dengan he zuen kevuwazan ni Huda he egkehimu he memumuhat.

<sup>15</sup>Ne keladu en utew he emun mid-ilisan en is minge memumuhat he kevuwazan ni Levi ne mid-ilisan daan is kesuguan su zuen selakew en he memumuhat he iring ki Milkisidik. <sup>16</sup>Ne wazà heini is begu himuwa he kelibutanen he memumuhat pinaagi te minge kelibutanen he kesuguan, kekenà, midhimu sikandin he memumuhat tenged te mekegegehem sikandin su wazè din kemetayen. <sup>17</sup>Su zuen insurat he Lalag te Megbevayà he zutun migkegiyan sikandin te Megbevayà te,

“Memumuhat ka he wazà pidtemanan te keggememumuhat nu iring te keggememumuhat ni Milkisidik.” <sup>18</sup>Ibpesavut kenitew kayi he is daan he kesuguan, in-awè en te Megbevayà su wazè din pulus ne kenà ebpeketavang kenitew te menusiya, <sup>19</sup>su kenà egkehimu he ed-isipen kiw he metazeng pinaagi te kedtumana kayi. Ne tenged kayi, imbegey en kenitew te Megbevayà is meupiya pa he egkeserigan he paagi. Ne pinaagi kayi, egkehimu he pinaagi te ked-azap tew ebpekeetuvang kiw en te Megbevayà.

<sup>20</sup>Ne kenà duen dà taman su utew zeyzey heini is begu he paagi su zutun te kedhimuwa te Megbevayà ki Jesus he memumuhat, mibpenaazan sikandin te Megbevayà. Iyan, hein nehimu zengan he memumuhat is minge kevuwazan ni Levi, wazà sikandan penaazi te Megbevayà. <sup>21</sup>Iyan, si Jesus mulà, mibpenaazan te Megbevayà su zuen insurat he Lalag te Megbevayà he edhenduen te,

“Siak is Megbevayà,  
impenaad ku  
he egkehimu ka he memumuhat ne wazà pidtemanan te  
keggememumuhat nu,  
ne kenè en heini ebperis.”

<sup>22</sup>Ne tenged kayi te penaad te Megbevayà, pinaagi ki Jesus egkesiguru tew he utew pa meupiya heini is begu he paagi he midtukud te Megbevayà te kedlibriya zin kenitew kenà is daan.

<sup>23</sup>Ne kenà duen dà taman su haazà is minge memumuhat dengan he minge kevuwazan ni Levi, kinahanglan he utew zan mezakel su emun ebpatay is duma kandan, kinahanglan he ed-ilisan dutun te zuma. <sup>24</sup>Iyan, si Jesus, wazà pidtemanan mulà te kandin he untung ne kenà sikandin egkeilisan he memumuhat. <sup>25</sup>Ne tenged kayi, egkehimu te minsan keenu he timpu he edlibriyen din te silut is minsan hentei he minge etew emun pinaagi kandin ed-aput sikandan diyà te Megbevayà su wazà pidtemanan te untung din, ne layun din egkehimu te edtavang sikandan diyà te etuvangan te Megbevayà.

<sup>26</sup>Iyan si Jesus lavew he memumuhat he egkinehnglanan tew su wazà igkesewayi te minge ulaula zin, wazè din salà, ne wazè din sayep. Ne kenà sikandin iring te minge mekesesalà he menusiya, ne midhimu sikandin te Megbevayà he lavew te minsan hentei ziyà te langit.

<sup>27</sup>Kenà sikandin iring te minge zaan he lavew he memumuhat su wazà kinahanglan he ebpemuhat sikandin andew-andew iring kandan. Su andew-andew ebpemuhat dan. Edhuna zan ebpemuhat tenged te kandan he keugelingen he salà, ne human dan ebpemuhat tenged te minge salà te minge etew. Iyan, si Jesus mulà, kesevaha zà is kandin he kebpemuhat ne wazè din en umani. Midhimu zin heini zutun te kebpehimatey zin diyà te krus. <sup>28</sup>Haazà is nengehimu he minge lavew he memumuhat

pinaagi te kesuguan he imbilinbilin ni Moises, ne layun duen igkesewayi kandan. Iyan, neuget pa zutun nehimu is Anak te Megbevayà he memumuhat tenged te kebpilia kandin te Megbevayà wey tenged te penaad te Megbevayà he nekeilis te zaan he kesuguan. Ne heini si Jesus he Anak te Megbevayà he wazà igkesewayi kandin, nehimu en sikandin he memumuhat he wazà pidtemanan is kegkememumuhat din.

### Is Begu he Paagi

**8** <sup>1</sup>Ne iyan kehulugan te langun he impesavut ku en keniyu is: duen tew en lavew he memumuhat he iring kayi ne iyan si Jesus. Impepinuu en sikandin diyà te utew lavew he pinuuwà su ziyà te zapit te egkekewanan te mekegegehem he Megbevayà diyà te langit. <sup>2</sup>Etdumanen din is kegkememumuhat din diyà te etuvangan te Megbevayà, diyà te tutuu he valey he ed-ezapan he wazà beeli te etew, kekenà, mibeelan te Megbevayà su ziyà te langit.

<sup>3</sup>Is lavew he memumuhat dini te kelibutan, insugù kandin is kebpemuhata te menge ibpelengesa wey is kebegaya te menge halad diyà te Megbevayà. Ne iring din ded daan kinahanglan he zuen daan ibpemuhat te kenitew he lavew he memumuhat. <sup>4</sup>Iyan, dutun te kemulu pa sikandin dini te kelibutan, kenà egkehimu he memumuhat sikandin su puun pa te zengan dà taman guntaan duen menge memumuhat he ebpemuhat sumalà is insugù kandan dutun te kesuguan he imbilinbilin ni Moises. <sup>5</sup>Alung dà is kandan he vaal su ed-iringan dan dà haazà is tutuu he ebpeiringan kandan he ziyà te langit. Netuenan ta heini su zutun te kebeeli ni Moises te simbahan he terapal he iyan dengan baley te Megbevayà dini te kelibutan, migkegiyan sikandin te Megbevayà te, “Purungi nu te ed-iring is simbahan diyà te langit he impeehe ku kenikew ziyà te vuntud. <sup>6</sup>Ne is baal ni Jesus te memumuhat, ne lavew pa utew he meupiya, kenà is baal te menge memumuhat dini te kelibutan. Ne iring din ded daan, meupiya pa utew is begu he paagi he ed-ikulen din wey kiw mezawat te Megbevayà, kenà is daan he paagi. Su heini is begu, ne nevigiran te tuwas pa he meupiya he penaad te Megbevayà.

<sup>7</sup>Haazà is nehuna he paagi, ne kenà ebpeketavang kenitew. Su ke neketavang haazà is nehuna kenè en kinahanglan he ed-ilisan pa maan te vegu. <sup>8</sup>Iyan, wazà mesuat is Megbevayà te menge ulaula te menge etew he nekesundan duen te nehuna he paagi su zuen insurat he Lalag te Nengazen he edhenduen te,

“Duen timpu keuzemà he zutun edhimuwen ku is begu en he paagi wey ku mezawat is langun he menge etew he kevuwazan ni Israyil.

<sup>9</sup>Ne heini is begu he paagi, ne kenà iring te nehuna he paagi he imbegey ku ziyà te menge lukes dan dengan te ked-egaka ku kandan dutun te kebpeewaa ku kandan dutun te tanà he Ihiptu.

- Wazè dan tumana is minge sugù ku zutun te nehuna he paagi ne tenged kayi mid-iniyugan ku sikandan,” ke sikandin.
- <sup>10</sup> Ne mid-uman megkagi is Nengazen te,  
 “Is begu he paagi he edtukuzen ku wey ku mezawat is minge kevuwazan ni Israyil,  
 ne iyan heini: is minge sugù ku,  
 ne idsurat ku ziyà te gehinawa zan wey ziyà te isip dan ne egkesuatan dan human te edtuman heini.  
 Ne human a egkehimu he Megbevayà dan ne egkehimu sikandan he minge gaked ku.
- <sup>11</sup> Ne tenged kayi, dutun he timpu keuzemà kenè en kinahanglan te minsan hentei he ebpepenurù te zuma zin mehitenged kedì, ne kenè en daan kinahanglan dutun he zuen pa maan etew he edseysey ziyà te zuma zin ke hentei a is Megbevayà su zutun egketuenan te minsan hentei,  
 lavew se kenà lavew, ke hentei a.
- <sup>12</sup> Ne egkehizuwan ku sikandan,  
 ne ebpeseyluwen ku sikandan te mezaat he mid-ulaula zan,  
 ne edlipatan ku en is minge salè dan,”  
 ke sikandin.
- <sup>13</sup> Ne geina te migkagi te Megbevayà he zuen begu en he paagi, egkesavut tew he kenè en ebplus haazà is daan. Ne ke zuen minsan hengkey he zaan en he kenè en egkegamit ne ed-engkezan en su ed-ilisan te vegu.

### Is Ked-azap Duen te Simbahan he Valey he Terapal

- 9** <sup>1</sup>Ne zutun te nehuna he paagi te kebpekidsevaha te Megbevayà te menusiya, impenurù te Megbevayà is paagi te ked-ezapa zan kandin wey ke ebmenmenuwen is kebeeli te simbahan dini te kelibutan.
- <sup>2</sup>Impehitindog dan is simbahan he valey he terapal ne zezuwa is rugu zutun. Is sevaha, ne iyan kes egngezanan te mahal he rugu. Ne zutun dan isavuk is sulù, wey is lemisahan he zutun isavuk is supas he ibpemuhat diyà te Megbevayà. <sup>3</sup>Duen kurtina zutun te idselang te valey he terapal ne zuen daan kurtina he intaltal zutun te mid-elangan te zezuwa he rugu. Ne heini is ikezuwa he rugu ne iyan kes egngezanan te utew mahal he rugu. <sup>4</sup>Ne is seled kayi, insavuk dan dutun kes pemuhatà he vulawan he zutun edtutunga is beyewà. Ne zutun daan isavuk kes kavan he mid-epizan te vulawan. Tuus heini is kavan te zaan he paagi he midtukud te Megbevayà. Diyà te seled dutun te kavan ne egkeahà is bulawan he umuy he zutun itagù kes keuyagan he mana. Ne zutun daan te seled te kavan egkeahà kes tuked ni Arun he mibpeneringsing wey kes dezuwa he melumpipi he watu he zutun isurat te Megbevayà kes kesuguan. <sup>5</sup>Ne insihung haazà is kavan dutun te zezuwa he ledawan te

menge mekegegehem he kedesenan he iyan tuus he zutun is Megbevayà. Mibekar zan is pakpak dan ne intezung dan dutun te vulawan he vangkù he zutun ebpelisa te Megbevayà is menge salà te menge etew. Ne kayi zà taman heini su kenè en egkehimu he id-amin ku te edseysey is langun kayi.

<sup>6</sup>Ne hein naandam dan en is langun kayi ne kada andew edseled is menge memumuhut dutun te nehuna he rugu he egngezanan te mahal he rugu su edtumanen dan is ebpeveelan kandan. <sup>7</sup>Iyan, haazà is sevaha he rugu he egngezanan te utew mahal he rugu, iyan dà ebpekeseled dutun is lavew he memumuhut. Ne kesevaha zà sikandin edseled dutun te sengetuig. Ne emun ed-ahuk sikandin dutun, kinahanglan he ed-uwiten din is lengesa he ibpemuhut wey mepalis is menge salè din wey is menge salà he wazà tuyua te langun he menge zuma zin he kevuwazan ni Israyil. <sup>8</sup>Iyan heini ulaula te menge memumuhut dutun te simbahan, ne pinaagi kayi ibpesavut kenitew te Wagas he Mulin-ulin he te kemulu pa kinahanglan he egemiten haazà is egkehuna he rugu he egngezanan te mahal he rugu, kenè pa ebpekeseled is menge etew zà duen dutun te utew mahal he rugu. <sup>9</sup>Ne alung heini he ibpesavut kenita he is menge ibpemuhut dutun he menge langgam wey is menge halad, kenà heini ebpekeawà te menge salà te menge etew he ed-azap dutun su nesavut dan he pinaagi kayi wazè dan pa himuwa he metazeng. <sup>10</sup>Su heini he paagi te ked-ezapa te Megbevayà, ne pinaagi zà te menge sugù mehitenged te vetasan te kegkaan, ked-inum, kebpenlùlù, wey kedhemesa te lawa he paagi he insugù te Megbevayà. Menge sugù heini he edtumanen te menge etew pinaagi zà te lawa wey tenged dà te insugù ne kenà tenged te iyan diyà te gehinawa zan. Ne is pulus kayi te paagi, ne taman dà heini kayi te timpu guntaan te ked-ilisi te Megbevayà kayi te vegu he paagi.

### Is Pemuhut ni Jesu Kristu

<sup>11</sup>Ne guntaan nekeuma en si Kristu, ne nehimu sikandin he lavew he memumuhut mehitenged kayi te vegu he paagi he meupiya kenà kes daan. Ne midseled sikandin diyà te meupiya pa wey lavew pa he simbahan he wazà beeli te etew zà duen su kenà dini te kelibutan. <sup>12</sup>Ne kesevaha zà is kedseled din dutun te utew mahal he rugu te simbahan he ziyà te langit ne kenè en ed-uman. Ne wazà sikandin mekeseled dutun tenged te kebpelengesa zin te lengesa te menge ayam dà duen, iring te menge kambing wey menge nati he vaka, kekenà, nekeseled dutun tenged te impelengesa zin is kandin he lengesa. Ne tenged kayi te kebpemuhata te lawa zin, midhimu zin he wazà pidtemanan te kedlibriya zin kenita te silut. <sup>13</sup>Dengan, sumalà is impenurù te kesuguan, ke zuen etew he mibmeremerik tenged te mid-uvayan din is minatey, kinahanglan he ebpetigisan sikandin te lengesa te ibpemuhut he vaka wey kambing,



wey igmuk te edtutungen he nati he vaka. Ne pinaagi kayi egkepelisan sikandin dutun te kegkeremeriki te lawa zin. <sup>14</sup>Ne emun egkehimu he egkelumpiyuwan haazà pinaagi zà te lengesa te menge vaka wey kambing, iyan pe be kenà utew pa lavew is egkelumpiyuwan pinaagi te lengesa ni Kristu. Su pinaagi te tavang te Wagas he Mulin-ulin he wazè din pidtemanan, impemuhat ni Kristu ziyà te Megbevayà is kandin he lawa; ne wazà igkesewayi kandin. Ne pinaagi te kebpelisi kenita te lengesa zin, in-awè din is menge salè ta wey is kebpekesarig ta te menge ulaula he wazè dan pulus. Ne tenged kayi ebpekezap ki en te wazè din kemetayen he Megbevayà.

<sup>15</sup>Ne tenged kayi zaan nehimu en si Kristu he zatù tew su wey zin metukud is begu en he paagi te kebpekidsevaha tew te Megbevayà. Ne pinaagi kayi, is langun he midhimu te Megbevayà he meketuu, egkezawat dan is langun he meupiya he wazè din pidtemanan he impenaad te Megbevayà. Umba egkehimu heini su pinaagi te kebpatey ni Kristu nengepalis is langun he menge mezaat he ulaula he nehimu te menge etew zutun te timpu he nengesakup sikandan te nehuna he paagi.

<sup>16</sup>Ne penenglitan, duen etew he mibaal te dukumintu ne migkagi zin dutun te dukumintu he emun ebpatay sikandin duen menge azen din he ibpepengevilin din te menge zuma zin. Ne zutun te kebpatey zin kinahanglan he zuen ebpeketistigus he tutuu iyan he minatey en haazà is etew, ne human ebpekezawat dutun te menge azen din haazà is migkagi zutun te dukumintu. <sup>17</sup>Emun kemulu pa uuyag haazà is tegiazen, ne kenè pa edtumanen haazà is migkagi zutun te dukumintu. Iyan, emun ebpatay en, human edtumana haazà. <sup>18</sup>Ne iring din ded daan haazà is nehuna he paagi he midtukud te Megbevayà su kinahanglan dutun he zuen lengesa he tuus te edhimetayan he langgam ne human egketuman haazà is paagi. <sup>19</sup>Ne tenged kayi, hein aney ipenurù ni Moises diyà te langun he menge etew is langun he ibpetuman kandan te Megbevayà dutun te kesuguan, migkuwa zin is lengesa te menge nati he vaka he impemuhat, ne mid-emutan din te wahig. Midhames din dutun is bulvul te kerehidu he midtinà te merigà wey is subpang te kayu he egngezanan te hisup. Ne mibpirikan din dutun is libru he zutun isurat is kesuguan wey mibpirikan din daan is langun he menge etew. <sup>20</sup>Ne migkegiyan din dutun is menge etew te, “Tuus heini is lengesa te paagi he midtukud te Megbevayà wey kiw zin mezawat, ne kinahanglan he ebpurungan tew te edtuman heini su insugù te Megbevayà,” ke sikandin. <sup>21</sup>Ne iring din ded daan mibpirikan ni Moises is simbahan he valey he terapal wey is langun he tagù dutun he egemiten dan te ked-ezapa zan te Megbevayà. <sup>22</sup>Impenurù te kesuguan he kinahanglan he ebpelisan te lengesa is hapit minsan hengkey he egemiten dan te ked-azap. Ne iring din ded daan wey zà egkepesaylu is menge salà te menge etew ke zuen ibpelengesa.

<sup>23</sup>Ne haazà is simbahan te minge Hudiyu zini te kelibutan wey is minge gelemiten dan te ked-azap, ne minge alung dà te tutuu he simbahan diyà te langit. Ne egkepelengesanan is kelibutanen he simbahan pinaagi te kelibutanen he pemuhat, iyan, haazà is diyà te langit, ne kinahanglan he lavew pa he meupiya is ibpemuhat dutun. <sup>24</sup>Dutun te kebpemuhat ni Kristu, wazè sikandin medseled diyà te utew mahal he rugu te simbahan he zini te kelibutan su alung dà heini te tutuu he simbahan he ziyà te langit. Iyan midselezan din kes tutuu he simbahan he ziyà te langit ne guntaan iyan sikandin datù tew he edtavang kenitew ziyà te etuvangan te Megbevayà. <sup>25</sup>Ne is lavew he memumuhat te minge Hudiyu, ne kada tuig edseled sikandin dutun te utew mahal he rugu zutun te simbahan dini te kelibutan su ibpemuhat din is lengesa te langgam. Iyan, si Kristu mulà, wazà melelayun is kebpemuhata zin te lawa zin <sup>26</sup>su emun iyan haazà egkinehenglanan, puun pa te kedlimbaga te kelibutan, ne utew mezakel is kebpekeantus din te kebpehimatey. Iyan, wazà iyan haazà kinehenglana su iyan mid-ulaula zin kayi te timpu he megaan en egketapus is kelibutan is: midlepew sikandin wey zin maawà is salè tew pinaagi te kebpemuhata zin te keugelingen din he lawa. Ne kesevaha zà is kedhimuwa zin kayi. <sup>27</sup>Imbanglis te Megbevayà diyà te menusiya is kebpatay te kesevaha, ne egkeipus dutun te kebpatay zin ne edsusiyen te Megbevayà is minge ulaula zin. <sup>28</sup>Ne si Kristu zaan, kesevaha zà is kebpehimatey zin he iyan kebpemuhata zin te lawa zin wey zin maawà is minge salà te utew mezakel he minge etew. Ne ed-uman pa ebulus si Jesus dini te kelibutan, kenà te ked-ewaa zin te minge salè tew, kekenà, edhimesazen din is kedlibriya zin te langun he utew zekelà is perateng dan kandin.

**10** <sup>1</sup>Ne egkesavut te en he is kesuguan he imbilinbilin ni Moises, ne alung dà; ne is langun he meupiya he egkehimu pinaagi ki Kristu, ne iyan hustu he impaalung dutun te kesuguan. Su insugù dutun te kesuguan he kinahanglan kada tuig, ne layun edhimuwa is minge kebpemuhat. Ne tenged kayi egkesavut ta zaan he pinaagi kayi te kebpemuhat kenà egkehimu he ebmetazeng is minge etew. <sup>2</sup>Su emun pinaagi zutun he paagi nelumpiyuwan is minge ulaula te minge ed-azap, ne wazè en kinahanglan he ed-uman dan pa ebpemuhat su nengepesaylu en pezem is minge salè dan ne egkesavut dan dutun he kenè en sikandan edsilutan tenged te minge mezaat he ulaula zan. <sup>3</sup>Ne geina te kada tuig dutun, kinahanglan gihapun he ed-uman dan ebpemuhat ne netueanan dan he wazè bes maawà is minge salè dan. <sup>4</sup>Su kenà egkehimu te minsan hengkey he paagi he igkeawà te minge salè tew is lengesa te minge vaka wey minge kambing.

<sup>5</sup>Ne egketueanan ta heini su zutun te timpu zengan he nekeuma si Kristu zini te kelibutan, migkagi sikandin diyà te Amey zin he Megbevayà te,

“Kena iyan is minge ibpemuhat he ayam egkesuatan nu, kekenà, midlimbag nu is lawa he egkegamit ku, ne iyan heini egkesuatan nu he ibpemuhat.

<sup>6</sup> Su kenè nu iyan egkesuatan is kebpemuhata zan te minge ayam he edtutungen wey is lengesa te minge ayam he ibpemalis te minge salè dan.

<sup>7</sup> Ne tenged kayi migkagi si Kristu ziyà te Megbevayà te, ‘Iyan impengetuvang ku kenikew su edtumanen ku en is egkesuatan nu sumalà is insurat he tagnà mehitenged kedì dutun te insurat he lalag nu,’ ke sikandin.

<sup>8</sup> Midhunaan din te egkagi he kenà egkesuatan te Megbevayà is minge halad wey minge kebpemuhat he edtutungen wey is lengesa te minge ayam he ibpemalis te salà. Ne migkagi zin heini minsan pa te intelaan heini te kesuguan. <sup>9</sup> Ne mid-umanan din te egkagi te, “Iyan impengetuvang ku kenikew su edtumanen ku en is egkesuatan nu.” Ne tenged kayi egkesavut tew he mid-ilisan te Megbevayà is daan he paagi te kebpemuhat ne iyan in-ilis dutun is kebpemuhata te lawa ni Kristu.

<sup>10</sup> Ne geina te midtuman ni Jesu Kristu is egkesuatan te Megbevayà, nengepalis is minge salè tew pinaagi te kesevaha zà he kebpemuhata zin te keugelingen din he lawa.

<sup>11</sup> Ne zutun te zaan he paagi te ked-azap, is minge memumuhat he Hudiyu, ne andew-andew ziyè dan te simbahan edhithitindig is edterebahu su edtumanen dan is baal zan te kebpemuhat. Ne heini is minge kebpemuhat dan, ne kenà gihapun ebpekeawà te minge salà te minge etew. <sup>12</sup> Iyan, si Kristu mulà, kesevaha zà sikandin mebpemuhat, ne naawà dutun is minge salè tew ne kenè en heini kinahanglan he ed-umanan pa maan te minsan keenu. Ne tuus te netapus din en heini is terebahu zin su mibpinuu sikandin diyà te lavew he pinuuwà te egkekewanan te Megbevayà su edhadì. <sup>13</sup> Ne kemulu pa sikandin dutun guntaan su edtegezan din is timpu keuzemà he zutun egkevaku te Megbevayà is langun he minge kuntada zin wey sikandin mekehadì. <sup>14</sup> Ne tenged kayi te kesevaha zà he kebpemuhat din diyà te Megbevayà, sikitew is mibpelisan din te salà, midhimu kiw zin he metazeng te wazà pidtemanan.

<sup>15</sup> Ne zuen daan ibpenurù kenitew te Wagas he Mulin-ulin dutun te insurat he Lalag te Megbevayà he edhenduen te,

<sup>16</sup> “Siak is Nengazen,  
 iyan heini vegu en he paagi  
 he edtukuzen ku zutun te minge sakup ku keuzemà wey ku sikandan mezawat.  
 Idsurat ku is minge sugù ku ziyà te gehinawa zan wey ziyà te isip dan,” ke sikandin.

<sup>17</sup>Ne mid-uman sikandin mekgagi te, “Is menge salè dan wey is menge mezaat he ulaula zin, edlipatan ku, ne kenè ku en maan ed-isipen.” <sup>18</sup>Ne zutun, geina te nengepesaylu zin en heini is langun, wazè en kinahanglan he zuen pa ibpemuhat he id-awà te menge salè ta.

### Is Ked-uvey Ziyà te Megbevayà

<sup>19</sup>Ne, menge suled, tenged te mibpehimatey si Jesus ne impetigis is lengesa zin, wazè en kekgelenew ta te kedseled pinaagi te ked-ampù dutun te utew mahal he rugu he seled te kurtina. <sup>20</sup>Su si Jesus, midhimu zin is ibayè ta pinaagi te kebpemuhata te lawa zin, ne heini is ibayà, ne ebpekevegey te untung he wazè din pidtemanan. <sup>21</sup>Ne kenà duen dà taman su zuen te en utew lavew he memumuhat he ebayàbayà kenitew te menge sakup te Megbevayà. <sup>22</sup>Ne tenged kayi, ed-etuvang ki en te Megbevayà, ne kenà tarù is ked-ezapa ta kandin. Edhegeten ta is kedtuu ta ne kenè ki eduwazuwa. Su netuenan ta he nepelisan ki en te lengesa ni Jesus ne netuenan ta zaan he in-awà kayi is menge salè ta. Nengebewartismuwan kiw en he tuus te kedlumpiyuwi kenitew te Megbevayà. <sup>23</sup>Edhemenan tew is meheget he kebperateng te kedtulusa kenitew keuzemà te wazà duwazuwa su netuenan tew he metinumanen is Megbevayà ne edhimuwen din is impenaad din kenitew. <sup>24</sup>Kenà tew ed-ewaan dini te gehinawa tew is kebpepurpurungè tew su wey layun mahal zini te gehinawa tew is minsan hentei, ne wey layun mehimu te uman sevaha kenitew is menge meupiya he ulaula. <sup>25</sup>Kenè tew ed-engkezan is kedtigum tew te ked-azap te Megbevayà; kenè tew ed-iringan is duma he menge tumutuu he mid-engkezan dan en is kedsimba, kekenà, edtigum kiw su wey kiw mekepesemsembagà. Utew heini kinahanglan, lavew en emun egketuusan ta he megaan en is kedlikù te Nengazen tew he si Jesus.

<sup>26</sup>Ne emun nesavut te en is tutuu he tuluuwen, iyan, edtuyuen te pa maan is layun ked-ulaula te mezaat he ulaula, wazè en minsan hengkey he kebpemuhat he edewaten te Megbevayà wey maawà is salè ta. <sup>27</sup>Is etew he iyan heini ulaula zin, ne iyan egkepengkusan din is mekelimlimezang he hukum kandin wey is utew meinit he hapuy he iyan idsilut te Megbevayà dutun te langun he edsukul kandin. <sup>28</sup>Su is minsan hentei zengan he wazè din tehuza is kesuguan he imbilinbilin ni Moises, emun edtistigusan heini te minsan tetelu wey ke zezuwa ve he tistigus, ne kenà egkehizuwan, kekenà, edhimetayan sikandin. <sup>29</sup>Ne emun iyan haazà, wey pe be kenà utew mevegat is idsilut dutun te etew guntaan he edsumpeliten din is hizu kandin te Anak te Megbevayà. Utew mevegat is idsilut kandin su igkepesavut din pinaagi zutun te mid-ulaula zin he wazà pulus dutun te lengesa ni Jesus he ibpalis pezem kandin he iyan tuus te vegu en he paagi te kebpekidsevaha te Megbevayà te menusiya. Mevegat

is silut kandin su edsumpeliten din is beligegawen he Wagas he Mulin-  
ulin. <sup>30</sup>Su netuenan tew he migkagi is Megbevayà te, “Iyan a ebales, iyan  
a edsilut kandan tenged te minge ulaula zan he mezaat.” Ne zuen daan  
insurat he lalag he edhenduen te, “Edsusiyan te Megbevayà is minge  
ulaula te minge sakup din.” <sup>31</sup>Ne emun iyan edsilut is Megbevayà he  
wazè din kemetayen, ne utew mekehandekhandek haazà is idsilut din!

<sup>32</sup>Isipa niw is timpu zengan hein sikan kew pa meteyawi te tutuu  
he tutuuwen ne midtuuwan niw. Uteu mezakel is kemeregenan he  
nengeegiyan niw, iyan, nekeantus kew ne wazà haazà ikeawà te kedtuu  
niw. <sup>33</sup>Mibpesipelahan kew ne midlupigan kew ziyà te etuvangan te  
mezakel he minge etew, ne zuen timpu he mid-unungan niw is minge  
zuma niw te minge pesipala kandan su nehizuwan niw. <sup>34</sup>Ne nehizuwan  
niw, ne midtevangan niw is minge tumutuu he nengepirisu. Ne minsan  
pa te mibpen-ileg te minge etew is langun he minge azen niw, midlipey  
kew gihapun su netuenan niw he zuen azen niw he utew pa meupiya  
ziyà te langit he kenà egkeileg diyà te keniyu te wazè din pidtemanan.  
<sup>35</sup>Umba, minge suled, kenè niw engkezi is kedsarig niw su emun  
meheget is kedsarig niw te Megbevayà, egkezawat niw is suhul zin he  
utew meupiya. <sup>36</sup>Kinahanglan he meinentusen kew wey niw metuman  
is egkesuatan te Megbevayà ne human niw egkezawat is impenaad din  
keniyu. <sup>37</sup>Su zuen insurat he Lalag te Megbevayà he edhenduen te,

“Megaan en is kebpekeuma te edtegazan niw ne kenà egkehimu he  
ebpekelimpas sikandin.

<sup>38</sup>Ne haazà is minge sakup ku he nengehimu en he metazeng tenged  
te kedtuu zan kedì,

ebegayan ku sikandan te untung he wazè din pidtemanan.

Iyan, ke zuen minsan hentei kandan he edsuwey tenged te  
kegkehandek, utew ku igkeepes,” ke sikandin.

<sup>39</sup>Iyan, sikitew, minge suled, kenè kiw iring te minge etew he edsuwey  
ne edsilutan sikandan te Megbevayà su mezesen mulà is kedtuu tew ne  
pinaagi kayi nelibri kiw en te silut.

### Is Kedtuu

**11** <sup>1</sup>Emun duen kedtuu ta te Megbevayà, egketuenan ta he  
egkezawat ta is meupiya he ebperetengen ta. Pinaagi te kedtuu  
ta, egketagù dini te gehinawa ta is kedewata ta keuzemà te minge  
vutang he wazè te pa maahà. <sup>2</sup>Is minge tipehuna he etew, nezeligan  
sikandan te Megbevayà tenged te midtuuwan dan sikandin.

<sup>3</sup>Netuenan ta he is minsan hengkey he egkeahà he midlimbag  
te Megbevayà, ne nehimu pinaagi zà te lalag din. Ne tenged kayi  
egketuenan ta he is minsan hengkey he egkeahà ne ziyà ebpuun te kenà  
egkeahà.

<sup>4</sup>Si Abel zengan, tenged te kedtuu zin te Megbevayà ne nehimu zin is utew pa meupiya he pemuhat kenà te impemuhat te kakey zin he si Kain. Ne tenged kayi te kedtuu ni Abel mid-isip te Megbevayà sikandin he metazeng su midawat te Megbevayà is impemuhat din. Ne minsan pa te zengan dà minatey si Abel zuen ketudluan an din kenitew tenged te mezesen is kedtuu zin.

<sup>5</sup>Ne si Inuk daan. Tenged te kedtuu zin wazà sikandin mebpatey su midtulus sikandin te Megbevayà ne kenè en sikandin egkeahà dini te kelibutan su ziyè en sikandin te Megbevayà. Duen insurat he Lalag te Megbevayà he ibpesavut he te wazè pa tulusa si Inuk, nesuat is Megbevayà te menge ulaula zin. <sup>6</sup>Is etew he wazè din kedtuu te Megbevayà, kenà egkehimu he egkesuatan te Megbevayà is menge ulaula zin. Su is etew he ebpetavang te Megbevayà, kinahanglan he edtuuwen din he zuen Megbevayà, ne kinahanglan daan he edtuuwen din he edtuvazan te Megbevayà te meupiya is minsan hentei he edhagù he ebpen-ahà te paagi wey sikandin mekepekid-emigu te Megbevayà.

<sup>7</sup>Ne zuen daan kedtuu ni Noe su hein midleguyan sikandin te Megbevayà te limas he egkehitavù, midtuuwan din, minsan te wazè din pa maahà haazà is limas. Ne mibeelan din is dekelà he avang he egngезanan te arka ne hein midlapey is dagat, nelibri sikandin wey is pemilya zin ne wazè dan melened. Ne pinaagi zutun te kedtuu zin, impesavut din he zait he edlimasen te Megbevayà is tivuuk he mekesesalà he menusiya. Ne zutun mid-isip sikandin te Megbevayà he metazeng tenged te midtuuwan din is migkagi te Megbevayà.

<sup>8</sup>Ne si Abraham daan, duen kandin he kedtuu. Su neketuu sikandin te Lalag te Megbevayà he ewai zin is inged din ne medhendiyà te selakew en he tanà he impenaad te Megbevayà he ibegey ziyà te kandin wey ziyà te menge kevuwazan din. Ne zutun mid-ewaan din is kandin he inged minsan pa te wazè din hanew zutun te tanà he impenaad kandin. <sup>9</sup>Ne hein nekeuma sikandin dutun te tanà, midtuuwan din he egkeuma is timpu keuzemà he idata kandin te Megbevayà haazà is tanà. Ne minsan pa zutun, is ed-ubpaan din dutun, ne menge lawig dà he mid-etepan te terapal he henduen te kenà sikandin meginged dutun te tanà. Ne iring din ded daan is mid-ulaula zutun te anak din he si Isaak wey is apù din he si Hakub, minsan pa te impenaad daan kandan te Megbevayà he egkeangkén dan haazà is tanà. <sup>10</sup>Su si Abraham, ne iyan hustu he ebperetengen din he inged sikan is inged diyà te langit he kenà egkezeetan te wazè din pidtemanan. Ne iyan mibpelanu wey mibaal kayi is Megbevayà.

<sup>11</sup>Ne si Sara zaan is esawa ni Abraham, duen kandin he kedtuu su minsan te wazà sikandin mekeanak wey utew en sikandin megurang, mibmekingey gihapun tenged te kedtuu zin te Megbevayà. Umba

mibmegingey sikandin su midtuuwan din is penaad kandin te Megbevayà he egkeuma is timpu he ed-anak sikandin. <sup>12</sup>Ne is esawa zin he si Abraham he utew en megurang daan he kenè en pezem egkehimu he ebmegingey si Sara pinaagi kandin, nevuwad gihapun ne nehimu sikandin he kepuun te utew mezakel he menge etew. Iring sikandan te pantad diyà te zagat wey te menge vituen diyà te langit su kenè en egkengevilang.

<sup>13</sup>Ne heini sikandan he neketuu te Megbevayà, pudu zan minatey te wazè dan pa mezawat haazà is impenaad kandan te Megbevayà he egkeangkèn dan haazà is tanà. Ne minsan pa zutun te wazè dan pa mezawat haazà is impenaad te Megbevayà, wazè dan engkezi is kedtuu zan su netuenan dan he egkeuget pa zutun egkezawat dan is ebperetengen dan he impenaad te Megbevayà. Ne ingkepesavut dan he kenà sikandan hustu he meginged dini te kelibutan su iyan hustu he inged dan is langit. <sup>14</sup>Ne is menge etew he iring kayi guntaan, kenè dan ed-isipen he iyan hustu he inged dan heini is kelibutan, kekenà, ebperetengen dan he zuen selakew he inged he iyan hustu he inged dan. <sup>15</sup>Ensi Abraham, wazè dan daan isipa he iyan hustu he inged dan haazà is mid-ewaan dan su emun iyan haazà, egkehimu he ed-uli dan dutun. <sup>16</sup>Su ebpen-ahaan dan is inged he utew pa meupiya, kenà haazà is mid-ewaan dan su iyan ebperetengen dan is egkeubpaan dan he inged diyà te langit. Ne geina te iyan haazà, ne mid-angkèn sikandan te Megbevayà ne netuenan ta he kenè din igkeeled is kegngezani zan kandin he Megbevayà dan su mid-andam din en is inged he egkeubpaan dan.

<sup>17,18</sup>Netuenan ta he impenaad te Megbevayà ki Abraham he pinaagi te anak din he si Isaak egkehimu he utew mezakel is kevuwan din. Ne hein migezaman te Megbevayà is kedtuu ni Abraham, migkegiyan din si Abraham he ipemuhat din si Isaak. Iyan, utew zekelà is kedtuu ni Abraham te penaad te Megbevayà ne tenged dutun wazè din isipa he kenà egkehimu he kenè din ibpemuhat si Isaak. <sup>19</sup>Su neisip ni Abraham he ke ebpatay si Isaak, egkehimu he ebenhawen te Megbevayà. Ne henduen be te nevanhew iyan si Isaak dutun su neisip ni Abraham he kenè en ebperis he ebpatay sikandin.

<sup>20</sup>Ne si Isaak daan, midtuu sikandin te penaad kandin te Megbevayà su mibpenubtuvazan din is menge anak din si Hakub wey si Esau.

<sup>21</sup>Ne si Hakub, midtuu zaan sikandin te Megbevayà su zutun te megaan din en kebpatay, mibpenubtuvazan din is menge apù din he menge anak ni Jose ne zutun mid-usazey ziyà te tuked din ne mid-azap din is Megbevayà.

<sup>22</sup>Ne si Jose zaan tenged te kedtuu zin, dutun te megaan din en kebpatay, netagnè din is ked-awà te langun he menge kevuwan te lukes din he si Israyil ziyà te tanà te Ihiptu. Ne intelaan din daan dutun he ke egenat dan en, uwita zan daan is lawa zin te minatey.



<sup>23</sup>Ne sikan daan is minge ginikanan ni Moises, ne zekelà is kedtuu zan te Megbevayà. Su minsan pa te insugù te hadi he edhimatayan is langun he minge vatà he maama te minge Hudiya, wazè dan mahandek ne zutun te ked-enaka ki Moises in-eles dan sikandin seled te tetelu he vulan su wey kenà sikandin mehimetayi su neehè dan he utew mekempet sikandin he vatà.

<sup>24</sup>Ne si Moises, duen daan kedtuu zin te Megbevayà, su hein megurang en sikandin, mid-ewaan din is meupiya he kebpekesavuk din diyà te valey te anak te hadi te Ihiptu, ne wazà sikandin mesuat he ed-umawen he anak te anak he vahi te hadi. <sup>25</sup>Su iyan din midtumù he merasey sikandin duma te minge etew he sakup te Megbevayà, kenà te kedlipey pinaagi te minge salà dini te kelibutan he egkehitavù te mevavè dà he timpu. <sup>26</sup>Neisip din he tuwas pa he meupiya is ked-entusa zin te kedlupigi kandin tenged te kedsarig din te mibpili he hadi he ibpevulus te Megbevayà keuzemà, kenà is dekelà he ketigeyunan he egkekuwa zin diyà te Ihiptu. Su iyan hustu he edtegazan din is langun he meupiya he ibegey kandin te Megbevayà keuzemà.

<sup>27</sup>Ne tenged te kedtuu zin mid-awà sikandin dutun te Ihiptu su wazè din ikehandek is kepauk te hadi te Ihiptu. Ne minsan pa te utew meregen is egkengesegazan din wazà sikandin medlikù su henduen be te egkeehè din he eduma kandin is Megbevayà he kenà egkeahà. <sup>28</sup>Ne tenged te kedtuu zin midtuman din is Pista te Kedlevayi ne insugù din he ebpelisan te lengesa te nati he kerehidu is gemawan te minge valey te minge kevuwazan ni Israyil. Umba midhimu zin heini su wey kenà mehimetayi is minge panganey he anak dan te velinsuguen te Megbevayà he ibpepenhimatey te langun he minge panganey he anak te minge etew ziyà te Ihiptu.

<sup>29</sup>Ne is minge kevuwazan ni Israyil, pinaagi te kedtuu zan te Megbevayà, nekerapas dan te zagat he egngezanan te Merigà he impedsuwey te Megbevayà, ne neiring te tanà he memazà haazà is imbayè dan. Iyan, is minge tig-Ihptu he edal-as kandan, ne nengelened dan pudu su imped-uliey te Megbevayà haazà is dagat he impedsuwey zin.

<sup>30</sup>Ne zuen daan kedtuu te minge kevuwazan ni Israyil, su hein nemekeuma zan dutun te ingkutà te inged he Hiriku ne kada andew seled te pitu he andew ed-elingkus dan dutun te kutà, ne zutun migevà te Megbevayà haazà is kutà. <sup>31</sup>Duen dutun te inged he Hiriku bahi he meremerik is ulaula zin he egngezanan ki Rahab. Ne minsan pa zutun, hein nekeuma is ed-eles-eles he minge sugù ni Moises he edsusi te keligen dutun te inged, midtuu si Rahab te Megbevayà ne midtevangan din haazà is minge etew. Ne neuget pa zutun hein migerà is minge zuma zin he wazà medtuu te Megbevayà, wazà sikandin iragkes tenged te kedtuu zin te Megbevayà.



<sup>32</sup>Kayi ku zà edtemana heini is gugud su emun ibpelaus ku pa kenè en egkampet is timpu emun eguguzen ku pa keniyu is kedtuu te minge zuma pa he minge etew iring ki Gidyun, si Barak, si Samsun, si Hipti, si David, si Samuel wey is ebpemeneuven dengan te Megbevayà. <sup>33</sup>Su pinaagi te kedtuu zan te Megbevayà nengezaag te zuma kandan is minge sundaru te minge zekelà he inged. Ne is minge zuma pa, metazeng is kedhedii zan te minge sakup dan, ne is duma pa, nezawat dan is impenaad kandan te Megbevayà, ne is duma, nezaag dan is ebpekekaid he erimaung ne wazè dan mekagat. <sup>34</sup>Ne is duma pa, tenged te kedtuu zan, wazè dan metutung te utew meinit he hapuy, ne is duma pa, wazà sikandan mehimetayi te minge kuntada zan. Ne is duma he utew meguyà, nehimu sikandan he utew mezesen pinaagi te kedtuu zan. Nehimu zan he utew mevurut te kebpekidtebek ne nengezaag dan is minge sundaru te minge kuntada zan. <sup>35</sup>Ne zuen daan minge vahi zengan he zekelà is kedtuu zan ne pinaagi kayi nevanhew is minge anak dan he minatey en.

Ne zuen pa zaan minge tumutuu zengan te Megbevayà he midakep, ne minsan pa te midrasey sikandan taman te kebpatay, wazè dan medlekà te kedtuu zan su wey sikandan keuzemà egkevanhew zutun te tuwas pa he meupiya he untung. <sup>36</sup>Duen pa tumutuu zengan he utew mid-eled-eled ne mibugel, ne is duma pa ne midhiketan ne mibpirisu. <sup>37</sup>Duen daan mibpenhimetayan pinaagi te kedtulenga te watu. Ne zuen pa zaan midliwazà tempeza, ne zuen pa zaan mibpenhimetayan pinaagi te tibas. Ne is duma pa, ne tenged te kenè dan ked-engkezi te kedtuu zan, ne iyan dà ugelingen dan is lundis te kerehidu wey kambing. Uteu zan nengeayuyu. Mibpemesipelahan wey midlupigan sikandan te minge etew. <sup>38</sup>Is minge mezaat he etew zini te kelibutan, kenè dan dait he ebpekiduma kayi te minge utew metazeng he etew! Ne is duma kayi te minge etew he tumutuu, ne nengeewaan dan is baley zan ne ziyè dan mengetazintazin te tanà he wazà ubpai te etew, wey ziyà te minge vuntud. Ne ziyè dan mekeubpa te minge surung diyà te minge pangpang wey te minge vudsi te tanà.

<sup>39</sup>Ne utew igkelihey te Megbevayà is minge etew he iring kayi, iyan, minsan pa zutun wazè dan pa zutun mezawat is penaad kandan te Megbevayà. <sup>40</sup>Su zuen meupiya pa utew he paagi he mid-isip te Megbevayà su mid-isip din he wey zin edtumana haazà is minge penaad din kandan ke ebpekeragkes kiw zutun te minge etew he edawat te minge penaad din.

### Is Kebmansuwa te Megbevayà te Menge Anak Din

**12** <sup>1</sup>Ne sikiteu zaan, minge suled, kayi te kedtuu tew te Megbevayà, ne iring kiw te ebpelumlumbeey. Ne geina te utew mezakel

is minge tumutuu zengan he nekepaahà kenitew he metinumanen is Megbevayà, kinahanglan he ed-engkezan tew en is minsan hengkey he ebpekesanggan kenitew te edlumbà wey is kenà hustu he ulaula he henduen be te layun tew egkeulaula, ne ebpekezesen kiw te ebpelelaguy taman te ebpekeuma kiw ziyà te edungguan tew. <sup>2</sup>Edhemenan ta is kedsarig ta ki Jesus su iyan sikandin puunà te kedtuu ta ne pinaagi zaan kandin egkeheget is kedtuu ta. Mid-antus din is kedrensanga kandin dutun te krus. Ne wazè din ikeeled haazà is kedhimetayi kandin, kekenà, mid-isip din he utew zin igkelipey is egkeulaula zin emun egkeipus haazà is ked-antus din. Ne guntaan mibpinuu en sikandin dutun te utew lavew he pinuuwà su ziyà te zapit te egkekewanan te Megbevayà.

<sup>3</sup>Ne si Jesus, ne utew merasey is impesegazan kandin tenged te kebpesipelahi kandin te minge lalung he etew. Tenged kayi isipa niw layun sikandin su wey kenà maawà is kedhamen niw te kedsarig niw, ne kenè kew edtepulen te ked-ulaula te meupiya. <sup>4</sup>Su netuenan niw he zutun te kedsukuli niw te mezaat he ulaula, wazà minsan hentei keniyu he midhimetayan tenged te kedtuu zin. <sup>5</sup>Kela ke nelipatan niw en is sambag te Megbevayà diyà te keniyu te minge anak din su zuen insurat he Lalag te Megbevayà he edhenduen te,

“Sikew, anak ku, emun edsewayen ku sikew,  
purungi nu susiya is minge ulaula nu.

Ne emun ebmensuwen ku sikew kinahanglan he kenà heini igkeawà  
te kedhamen nu kedsarig kediey.

<sup>6</sup>Su is minsan hentei he mahal zini te gehinawa ku, edsewayen ku,  
ne is minsan hentei he ed-engkenen ku he anak ku,  
ebpenuruen ku pinaagi te merasey wey sikandin memansu,” ke  
sikandin.

<sup>7</sup>Umba, ke minsan hengkey is meregen he egkeulaula niw guntaan, entusa niw, su pinaagi kayi ebpenuruen kew te Megbevayà su minge anak kew zin. Ne wazà anak he kenà ebmensuwen te amey zin. <sup>8</sup>Emun kenè kew ebmensuwen te Megbevayà kenè kew tutuu he minge anak din, kekenà, iring kew te ingkegingey zà. <sup>9</sup>Su minsan is amey ta zini te kelibutan, emun ebmensuwen ki zin ne ebpekepevayàbayè ki gihapun kandin, wey pe be kenà mehimu he ebpekepevayàbayè ki zaan te Amey ta ziyà te langit? Su pinaagi kayi egkeangkèn ta is untung he wazè din pidtemanan. <sup>10</sup>Is amey ta zini te kelibutan, ne seled te mevavè dà he timpu is kebmensuwa zin kenita sumalà is neisip din he meupiya. Ne, is Amey ta ziyà te langit, iyan ibmensuwa zin kenita su wey ki metevangi ne wey ki zaan mehimu he mebmatazeng he iring kandin. <sup>11</sup>Ne emun ebmensuwen ki te Megbevayà, kenè ta egkesuatan su merasey is egkeulaula ta. Iyan, emun egkepasad haazà is kebmensuwa zin kenita, ne pinaagi kayi nemansu ki en te Megbevayà, ne metazeng en is minge ulaula ta, ne zutun utew melinew is kebpekesavuk ta.

<sup>12</sup> Umba, minge suled, hegeta niw is kedsarig niw, ne hemeni niw en is kedtuu niw. <sup>13</sup> Peniguduwi niw te ed-ikul is hustu he ibayà su wey kenà luyahi is minge zuma niw he mehugkà is kedtuu zan, kekenà, melig-eni is kedtuu zan.

### Is Petizaan Mehitenged te Kedsupaka te Megbevayà

<sup>14</sup> Himuwa niw is taman te egkehimu niw su wey melinew is kebpekidepitè niw te minsan hentei ne wey niw metuman is metazeng he ulaula su emun kenè ki metazeng kenè ta is Megbevayà egkeahà keuzemà. <sup>15</sup> Bantey kew su kela ke zuen duma keniyu he kenà edawat te gagew te Megbevayà. Su is iring kayi he etew, ne ebpekeiring te sagbet he ebpemegas te mepait he ebpekehilu. Ebpekesamuk sikandin te minge tumutuu ne mezakel he etew is ebpekeiring kandin te ed-ulaula te mezaat. <sup>16</sup> Bantey kew su wey wazà minsan sevaha keniyu he meremerik is ulaula zin wey ke ed-iniyugan din be is Megbevayà su iring kayi si Esau zengan. Is ketenged din te kegkekakey he anak, inliwè din te keenen he sengepegkaan dà. <sup>17</sup> Ne neuget dutun neisip din he meupiya ke iyan sikandin is kakey penubtuvazi te amey zin wey metuvazi sikandin te Megbevayà, iyan, wazà mehimu su kenè en egkehimu he edhewien din pa maan is inliwè din en, minsan pa te nekesinegew sikandin is edhangyù.

<sup>18</sup> Is paagi te ked-uvey ziyà te Megbevayà he impenurù kenitew, ne kenè en iring te paagi te minge kevuwazan dengan ni Israyil. Su iyan mid-uvayan dan is egkeehè dan su ziyà te vuntud he Siney he utew meregreg. Merusirem dutun tenged te kivel ne utew mevendes is keramag. <sup>19</sup> Egkezineg dan is budyung wey is mezaging he lageng te Megbevayà. Ne hein nezineg te minge etew haazà is lageng, midhangyù dan he med-engked haazà is egkagi su utew mekehandekhandek. <sup>20</sup> Su utew zan ingkehandek is migkagi zin he ke sikandin te, “Ke zuen minsan hentei, minsan is ayam niw he ed-uvey pa kayi te vuntud, ne kinahanglan he edhimetayan pinaagi te kedtulenga te watu.” <sup>21</sup> Ne haazà is neehè dan dutun, ne utew mekehandekhandek ne minsan si Moises, nekagi zin he migkerker sikandin tenged te kegkehandek din.

<sup>22</sup> Iyan, sikitew mulà, kenà iring dutun is ked-uvey tew te Megbevayà su iring te ed-uvayan tew is buntud he Siyun he zutun is inged te Megbevayà he wazè din kemetayan. Iyan haazà kes inged he Hiruselim diyà te langit he zutun nengetigum is egkengelihey he edliblibuwen he minge velinsuguen te Megbevayà. <sup>23</sup> Iring te mid-uvayan tew en is pengenayan he minge anak te Megbevayà he inlista is minge ngazan dan diyà te langit. Ne mid-uvayan tew en is Megbevayà he iyan edsusi te minge ulaula te tivuuk he menusiya. Mid-uvayan tew zaan is gimukud te langun he minge etew he minge metazeng he minatey en he netapus en is kedlibriya kandan te mezaat he ulaula. <sup>24</sup> Mid-uvayan tew zaan si Jesus

he iyan datù tew he midhimu te vegu en he paagi te kebpekidsevaha tew te Megbevayà. Pinaagi te lengesa zin nengepelisan is menge salè tew. Tuus is lengesa zin te gagew kenitew te Megbevayà he utew haazà meupiya kenà te lengesa ni Abel zengan *su is lengesa ni Abel, iyan tuus te silut te Megbevayà*.

<sup>25</sup> Umba, purung kew pemineg te Lalag te Megbevayà ne kenè kew sukul. Su is menge etew zengan he wazè dan peminega is Lalag te Megbevayà he insugù kandan ni Moises dini te kelibutan, emun wazà sikandan mekelikey te silut te Megbevayà, iyan kew pe be mekelikey te silut emun kenè niw ebpeminegen is egkegiyen din te ebpuun te langit.

<sup>26</sup> Dengan, migkerker is tanà tenged te utew mezaging he lageng te Megbevayà; iyan, migkagi zin he zuen timpu keuzemà he ed-umanan din ibpekerker, kenà iyan dà is tanà, kekenà, ragkes is langit. <sup>27</sup> Ne iyan kehulugan kayi te menge lalag he edhenduen te, “ed-umanan din ibpekerker” is: id-awè din is minsan hengkey he egkewaleng su wey iyan dà metagak is minsan hengkey he kenà egkewaleng.

<sup>28</sup> Umba, kinahanglan he zekelà is kebpeselemati tew kandin su iyan kiw menge sakup te ginhedian din he kenà egkehanew te wazè din pidteman. Kinahanglan he ed-azap kiw kandin te paagi he iyan egkesuatan din. Ne edtehuzan tew sikandin duma is kegkehandek; <sup>29</sup> su is Megbevayè tew, iring te utew meinit he hapuy is kedsilut din.

### Is Huziyan he Menge Telaan

**13** <sup>1</sup> Kinahanglan he peniguduwi niw is kebmahala niw ziyà te gehinawa niw te menge zuma niw he tumutuu. <sup>2</sup> Kenè niw lipati he kinahanglan he ibpeehè niw is gagew niw ziyà te menge etew he kenè niw kilala. Gelgelawa niw ziyà te valey niw su zuen dengan menge etew he zuen menge megeliyug dan, iyan, wazè dan metueni he menge velinsuguen bes haazà te Megbevayà he ebpuun diyà te langit.

<sup>3</sup> Kenè niw lipati is kedtawang niw te menge tumutuu he pirisu. Purungi niw sikandan he iring te iyan kew nepirisu. Tevangi niw zaan is menge tumutuu he ebpesipelahan he iring te iyan is keugelingen niw he lawa nepesipelahan.

<sup>4</sup> Kinahanglan he tehuza niw te langun is ked-es-esawa niw. Kinahanglan he wazà minsan hentei he edselselaan din is esawa zin. Edsilutan te Megbevayà is etew he meremerik is ulaula zin wey is etew he edselselaan din is esawa zin.

<sup>5</sup> Bantey kew su kela ke utew subra is suat niw te selapì. Kinahanglan he imeupiye en te gehinawa niw is naazen niw, su migkagi is Megbevayà te, “Kenè ku sikiyu ed-ewaan ne kenè ku sikiyu ed-engkezan.” <sup>6</sup> Umba, menge suled, dekelà is kedsarig ta te Megbevayà ne ebpekekagi ki te, “Iyan edtawang kedì is Megbevayà,

umba kenà a egkehandek te minsan hengkey he ed-ul-ulahan te etew zà duen dini te kediey.”

<sup>7</sup>Kenè niw lipati is menge egalen niw te nengehuna he timpu he nekepenurù keniyu te Lalag te Megbevayà. Isipa niw is meupiya he nehimu pinaagi te menge ulaula zan ne iring kandan hemeni niw is kedtuu niw ki Jesu Kristu. <sup>8</sup>Su si Jesu Kristu, ne kenà egkehalin. Iyan ded sikandin gihapun dengan, wey guntaan, wey keuzemà te wazè din pidtemanan. <sup>9</sup>Umba, kenè niw tuuwi is menge selakew he tuluuwen he kenà iyan kes tutuu he impenurù keniyu. Iyan hustu he ibmelig-en te kedtuu tew is kedtevangi kenitew te Megbevayà, ne kenà iyan is kedlikayi te menge egkeenen he indawey te kesuguan su wazà heini ikezeyzey te menge etew he ebantey kayi.

<sup>10</sup>Sikitew is menge tumutuu ki Kristu, duen tew en ingkepemuhat, iyan, haazà is menge memumuhat he Hudiyu he ziyà ebpmuhat te simbahan he ziyà te Hiruselim, wazè dan ketenged te kegkaan kayi.

<sup>11</sup>Netuenan niw he emun duen ibpmuhat te menge Hudiyu su ebpelisan dan is menge salè dan, ne is lengesa te ibpmuhat, ed-uwiten te lavew he memumuhat diyà te seled te utew mahal he rugu zutun te simbahan, iyan, is lawa te ibpmuhat ne ed-uwiten dan pehendiyà te gawas te inged ne zutun dan edtutunga. <sup>12</sup>Iring din ded daan is neulaula ki Jesus su midhimetayan sikandin diyà te gawas te inged ne nehimu is lengesa zin he ibpalis te menge salè tew te menusiya. <sup>13</sup>Umba, menge suled, egawas kiw zaan te inged ne edhendiyè kiw en te kandin, *he ke và dà egkegiya, kenè tew en edserigan is kedtumana te menge tuluuwen te menge Hudiyu, kekenà, iyan dà edserigan tew si Jesus. Edsundanan tew sikandin ne kenè tew igkehandek is ked-entusa tew te kedsudia kenitew tenged te kedtuu tew kandin.* <sup>14</sup>Su kenà ebpedayun is kebpekeubpè tew kayi te kelibutan, kekenà, ebperetengen tew pa is tutuu he inged tew keuzemà he iyan ed-ubpaan tew te wazè din pidtemanan. <sup>15</sup>Ne tenged dutun kinahanglan he pinaagi ki Jesus he memumuhat tew, iyan tew layun ibpmuhat diyà te Megbevayà is kedeliga tew kandin. Layun tew ibpaahà diyà te Megbevayà is kebpeselamati tew kandin. <sup>16</sup>Kenè niw lipati is kebporung niw te minsan hentei he zuma niw, ne mebpetebtevangè kew su is ulaula he iring kayi, ne iring te pemuhat he egkesuatan te Megbevayà.

<sup>17</sup>Tumana niw is sugù te menge egalen niw te menge tumutuu ne ipeehe niw is kedtehuza niw kandan su iyan sikandan ed-elima keniyu te edtuu, ne zuen timpu keuzemà he edsusiyen te Megbevayà ke metinumanen dan be is ed-elima keniyu. Emun ebpminegen niw is sugù dan, utew ibmeupiya te gehinawa zan is baal zan. Ne emun kenè kew ebpmineg, utew meregen is baal zan ne egkehimu zaan heini he idlised niw.

<sup>18</sup>Menge suled, iampù key layun keniyu. Netuenan dey he wazà igkesawey te menge ulaula zey su iyan dà egkesuatan dey he meveeli

zey is layun meupiya. <sup>19</sup>Ne iampù a zaan keniyu wey a megaan ipeulì te Megbevayà diyan te keniyu.

<sup>20</sup>Is Megbevayà, mibanhew zin is Nengazen tew he si Jesus. Midtigis is lengesa zin he iyan tuus te vegu wey wazà pidtemanan he paagi te kebpekidsevaha tew te Megbevayà. Ne tenged dutun nehimu si Jesus he mekegegehem he ed-elima kenitew te menge kerehidu zin. <sup>21</sup>Berakat he pinaagi ki Jesu Kristu, is Megbevayà he ebegey te kelinew, begayi kew zin te minsan hengkey he tavang wey niw tumana is egkesuatan din. Berakat daan he himuwa kiw zin he menge etew he utew zin egkesuati is menge ulaula. Edeligen tew si Jesu Kristu te wazà pidtemanan.

<sup>22</sup>Menge suled, edhengyuan ku sikiyu he entusa niw is kebpmineg kayi te langun he menge lalag ku keniyu su kenà utew melugayad heini is insurat ku. <sup>23</sup>Iyan daan tudtul ku keniyu is: impegawas en te pirisuwan is suled tew he si Timoteo. Emun petuluy ebpekeuma sikandin dini edumahan ku ke ebpekehendiyan a.

<sup>24</sup>Ipengemusta a keniyu te langun he menge egalen niw wey te langun he menge sakup te Megbevayà diyan. Is menge suled tew zini te Italya, ne ebpengemusta zaan sikandan keniyu.

<sup>25</sup>Berakat he ikegagew kew is langun te Megbevayà.